

四庫全書

史部

欽定四庫全書

史部

越絕書卷八至十五

詳校官編修臣李 漢

侍讀臣孫球覆勘

總校官降調編修臣倉聖脉

校對官中書臣李斯咏

賛錄監生臣呂仲玉

欽定四庫全書

越絕書卷八

漢 袁康 撰

外傳記地傳

昔者越之先君無餘乃禹之世別封於越以守禹冢問
天地之道萬物之紀莫失其本神農嘗百草水土甘苦
黃帝造衣裳后稷產穡制器械人事備矣疇糞桑麻播
種五穀必以手足大越海濱之民獨以鳥田小大有差

進退有行莫將自使其故何也曰禹始也憂民救水到大越上茅山大會計爵有德封有功更名茅山曰會稽及其王也巡狩大越見耆老納詩書審銓衡平斗斛因病亡死葬會稽葦柳桐棺穿墳七尺上無漏泄下無即水壇高三尺土階三等延袤一畝尚以為居之者樂為之者苦無以報民功教民鳥田一畝一衰當禹之時舜死蒼梧象為民田也禹至此者亦有因矣亦覆釜也覆釜者州土也填德也禹美而告至焉禹知時晏歲暮年加申

酉求書其下祠白馬禹井井者法也以為禹葬以法度
不煩人衆無餘初封大越都秦餘望南千有餘歲而至
勾踐勾踐徙治山北引屬東海內外越別封削焉勾踐
伐吳霸闕東從瑯琊起觀臺臺周七里以望東海死士
八千人戈船三百艘居無幾躬求賢聖孔子從弟子七
十人奉先生雅琴治禮往奏勾踐乃身被賜一作陽
又音唐夷
之甲帶步光之劍杖物盧之矛出死士三百人為陣闕
下孔子有頃姚稽一作為陣到越越王曰唯唯夫子何以教

之孔子對曰丘能述五帝三王之道故奉雅琴至大王所句踐喟然歎曰夫越性脆而愚水行而山處以船為車以楫為馬往若飄風去則難從銳兵任死越之常性也夫子異則不可於是孔子辭弟子莫能從乎

越王夫鐸

一作
鐸

以上至無餘久遠世不可紀也夫鐸子

允常允常子句踐大霸稱王徙瑯琊都也句踐子與夷

時霸與夷子子翁時霸子翁子不揚時霸不揚子無疆時霸伐楚威王滅無疆無疆子之侯竊自立為君長之

侯子尊時君長尊子親失衆楚伐之走南山親以上至
句踐凡八君都瑯琊二百二十四歲無疆以上霸稱王
之侯以下微弱稱君長

句踐小城山陰城也周二里二百二十三步陸門四水
門一今倉庫是其宮臺處也周六百二十步柱長三丈
五尺三寸雷高丈六尺宮有百戶高丈二尺五寸大城
周二十里七十二步不築北面而滅吳徙治姑胥臺
山陰大城者范蠡所築治也今傳謂之蠡城陸門三水

門三決西北亦有事到始建國時蠡城盡

稷山者勾踐齋戒臺也

龜山者勾踐起怪游臺也東南司馬門因以炤龜又仰望天氣觀天怪也高四十六丈五尺二寸周五百三十二步今東武里一曰怪山怪山者往古一夜自來民怪之故謂怪山

駕臺周六百步今安城里

離臺周五百六十步今淮陽里丘

美人宮周五百九十步陸門二水門一今北壇利里丘
土城句踐所習教美女西施鄭旦宮臺也女出於苧蘿
山欲獻於吳自謂東垂僻陋恐女樸鄙故近大道居去
縣五里

樂野者越之戈獵處大樂故謂樂野其山上石室句踐
所休謀也去縣七里

中指臺馬丘周六百步今高平里丘

東郭外南小城者句踐冰室去縣三里句踐之出入也

齊於稷山往從田里去從北郭門炤龜龜山更駕臺馳
於離丘遊於美人宮興樂中宿過歷馬丘射於樂野之
衢走大若耶休謀石室食於冰厨領功銓土已作昌土
臺藏其形隱其情一曰冰室者所以備膳羞也

浦陽者勾踐軍敗失衆適於此去縣五十里

夫山者勾踐絕糧困也其山上大冢勾踐庶子冢也去
縣十五里勾踐與吳戰於浙江之上石買為將者老壯
長進諫曰夫石買人與為怨家與為仇貪而好利細人

也無長策王而用之國必不遂王不聽遂遣之石買發行至浙江上斬殺無罪欲專威服中軍動搖將卒獨專其權士衆恐懼人不自聊兵法曰視民如嬰兒故可與赴深溪士衆魚爛而買不知尚猶峻法隆刑子胥獨見可奪之證變為奇謀或北或南夜舉火擊鼓晝陳詐兵越師潰墜政令不行背叛乖離還報其王王殺買謝其師號聲聞吳吳王恐懼子胥私喜越軍敗矣胥聞之狐之將殺啜脣吸齒今越句踐其已敗矣君王安意越易

薰也使人入問之越師請降子胥不聽越棲於會稽之山吳退而圍之勾踐喟然用種蠡計轉死為霸一人之身吉凶更至盛衰存亡在於用臣治道萬端要在得賢越棲於會稽日行成於吳吳引兵而去勾踐將降西至浙江待詔入吳故有雞鳴墟其入辭曰亡臣孤勾踐故將士衆入為臣虜民可得使地可得有吳王許之子胥大怒目若夜光聲若哮虎此越未戰而服天以賜吳其逆天乎臣唯君王急剏之吳不聽遂許之浙江是也

陽城里者范蠡城也西至水路水門一陸門二

北陽里城大夫種城也取土西山以濟之徑百九十四步或為南安

富陽里者外越賜義也處里門美以練塘田

安城里高庫者勾踐伐吳禽夫差以為勝兵築庫高閣之周二百三十步今安成里

故禹宗廟在小城南門外大城內禹稷在廟西今南里獨山大冢者勾踐自治以為冢徙瑯琊冢不成去縣九

里

麻林山一名多山句踐欲伐吳種麻以為弓絃使齊人
守之越謂齊人多故曰麻林多以防吳以山下田封功
臣去縣一十二里

會稽山上城者句踐與吳戰大敗棲其中因以下為目
魚池其利不租

會稽山北城者子胥浮兵以守城是也

若耶大冢者勾踐所徙葬先君夫蟬冢也去縣二十五

里

葛山者勾踐罷吳種葛使越女織治葛布獻於吳王夫差去縣七里

姑中山者越銅官之山也越人謂之銅姑瀆長二百五十里去縣二十五里

富中大塘者勾踐治以為義田為肥饒謂之富中去縣二十里二十二步

犬山者勾踐罷吳畜犬獵南山白鹿欲得獻吳神不可

得故曰犬山其高為犬亭去縣二十五里

白鹿山在犬山之南去縣二十九里

雞山豕山者勾踐以畜雞豕將伐吳以食士也雞山在
錫山南去縣五十里豕山在民山西去縣六十三里洹
江以來屬越疑豕山在餘暨界中

練塘者勾踐時采錫山為炭稱炭聚載從炭瀆至練塘
各因事名之去縣五十里

木客大冢者勾踐父允常冢也初徙瑯琊使樓船卒二

千八百人伐松柏以為梓故曰木客去縣十五里一曰
句踐伐善林文刻獻於吳故曰木客

官瀆者句踐工官也去縣十四里

苦竹城者句踐伐吳還封范蠡子也其僻居徑六十步
因為民治田塘長千五百三十三步其冢名土山范蠡
苦勤功篤故封其子於是去縣十八里

壯郭外路南溪壯城者句踐築鼓鐘宮也去縣七里其
邑為龔錢

舟室者句踐船宮也去縣五十里

民西大冢者句踐客秦伊善炤龜者冢也因名冢為秦

伊山

射浦者句踐教習兵處也今射浦去縣五里射卒陳音山
死葬民西故曰陳音山

種山者句踐所葬大夫種也樓船卒二千人鈞足羨葬
之三蓬下種將死自策後有賢者百年而至置我三蓬
自章後世句踐葬之食傳三賢

巫里句踐所徙巫為一里去縣二十五里其亭祠今為和公郡社稷墟一作虛

巫山者越驅神巫之宮也死葬其上去縣十三里

六山者句踐鑄銅鑄銅不燐埋之東坂其上馬篋句踐遣使者取於南社徙種六山飾治為馬篋獻之吳去縣三十五里

江東中巫葬者越神巫無杜子孫也死句踐於中江而葬之巫神欲使覆禍吳人船去縣三十里

石塘者越所害軍船也塘廣六十五步長三百五十三步去縣四十里

防塢者越所以遏吳軍也去縣四十里

杭塢者勾踐杭也二百石長員卒七士人度之會夷去縣四十里

塗山者禹所取妻之山也去縣五十里

朱餘者越鹽官也越人謂鹽曰餘去縣三十五里

勾踐已滅吳使吳人築吳塘東西千步名辟首後因以

為名曰塘

獨婦山者勾踐將伐吳徙寡婦致獨山上以為死士示得專一也去縣四十里後說之者蓋勾踐所以遊軍士也

馬嘆者吳伐越道逢大風車敗馬失騎士墮死足馬啼
臯事見吳史

浙江南路西城者范蠡敦一作熟兵城也其陵固可守故謂之固陵所以然者以其大船軍所置也

山陰古故陸道出東郭隨直瀆陽春亭山陰故水道出
東郭從郡陽春亭去縣五十里

語兒鄉故越界名曰就李吳疆越地以為戰地至於柴
辟亭

女陽亭者勾踐入官於吳夫人從道產女此亭養於李
鄉勾踐勝吳更名女陽更就李為語兒鄉

吳王夫差伐越有其邦勾踐服為臣三年吳王復還封

勾踐於越東西百里北鄉臣事吳東為右西為左大越

故界浙江至就李南姑末寫干

觀鄉壯有武原武原今海鹽姑末今大末寫干今屬豫
章自無餘初封於越以來傳聞越王子孫在丹陽臯鄉
更姓梅梅里是也自秦以來至秦元王不絕年元王立
二十年平王立二十三年惠文王立二十七元武王立
四年昭襄王亦立五十六年而滅周赧王周絕於此孝
文王立一年莊襄王更號太上皇帝立三年秦始皇帝
立三十七年號曰趙政政趙外孫胡亥立二年子嬰立

六月秦元王至子嬰凡十王百七十歲漢皇帝滅之治咸陽壹天下政使將魏舍內史教攻韓得韓王安政使將王賁攻魏得魏王歇政使將王涉攻趙得趙王尚政使將王賁攻楚得楚王成政使將史教攻燕得燕王喜政使將王涉攻齊得齊王建政更號為秦始皇帝以其三十七年東遊之會稽道度牛渚奏東安東安今富春丹陽溧陽

鄣故餘杭軻亭南東奏槿頭道度諸暨大越以正月甲

戊到大越留舍都亭取錢塘浙江岑石石長丈四尺南北面廣六尺西面廣尺六寸刻丈六於越東山上其道九曲去縣二十一里是時徙大越民置餘杭伊攻故鄣因徙天下有罪適吏民置海南故大越處以備東海外越乃更名大越曰山陰已去奏諸暨錢塘因奏吳上姑蘇臺則治射防於完亭賈亭北年至靈不射去奏曲阿句容度牛渚西到咸陽崩

越絕書卷八

欽定四庫全書

越絕書卷九

漢 袁康 撰

外傳計倪

昔者越王句踐近侵於彊吳遠媿於諸侯兵革散空國且滅亡乃脅諸臣而與之盟吾欲伐吳奈何有功羣臣默然而無對王曰夫主憂臣辱主辱臣死何大夫易見而難使也計倪官卑年少其居在後舉首而起曰殆哉

非大夫易見難使是大王不能使臣也王曰何謂也計
倪對曰夫官位財幣王之所輕死者是士之所重也王
愛所輕責士所重豈不艱哉王自揖進計倪而問焉計
倪對曰夫仁義者治之門士民者君之根本也閭門固
根莫如正身正身之道謹選左右左右選則孔主日益
上不選則孔主日益下二者貴質浸之漸也願君王公
選於衆精鍊左右非君子至誠之士無與諸侯使邪僻
之氣無漸以生仁義之行有階人知其能官知其治爵

賞刑罰一由君出則臣下不敢毀譽以言無功者不敢
干治故明主用人不由所從不問其先說取一焉是故
周文齊桓躬於任賢太公管仲明於知人今則不然臣
故曰殆哉越王勃然曰孤聞齊威淫佚九合諸侯一匡
天下蓋管仲之力也寡人雖愚唯在大夫計俛對曰齊
桓除管仲罪大責任之至易此故南陽蒼苟太公九十
而不伐磻溪之餓人也聖主不計其辱以為賢者一乎
仲二乎仲斯可致王但霸何足道桓稱仲父文稱太公

計此二人曾無跬步之勞大呼之功乃忘弓矢之怨授
以上卿傳曰直能三公今置臣而不尊使賢而不用譬
於門戶像設倚而相欺蓋智士所恥賢者所差君王察
之越王曰誠者不能匿其辭大夫既在何須言哉計倪
對曰臣聞智者不妄言以成其勞賢者始於難動終於
有成傳曰易之謙遜對過問抑威權勢利器不可示人
言賞罰由君此之謂也故賢君用臣略責於絕施之職
而成其功遠使以效其誠內告以匿以知其信與之講

事以觀其智飲之以酒以觀其態選士以備不肖者無
所置越王大媿乃壞池填塹開倉穀貸貧乏仍使羣臣
身問疾病躬視死喪不厄窮僻尊有德與民同苦樂激
河泉井示不獨食行之六年士民一心不謀同辭不呼
自來皆欲伐吳遂有大功而霸諸侯孔子曰寬則得衆
此之謂也夫有勇見於外必有仁於內子胥戰於就李
闔廬傷馬軍敗而還是時死傷者不可稱數所以然者
罷頓不得已子胥內憂為人臣上不能令主下令百姓

被兵刃之咎自責內傷莫能知者故身操死持傷及被
兵者莫不悉於子胥之手垂涕啼哭欲伐而死三年自
咎不親妻子饑不飽食寒不重綵結心於越欲復其仇
師事越公錄其述仰天之兆牽牛南斗赫赫斯怒與天
俱起發令告民歸如父母當胥之言唯恐為後師衆同
心得天之中越乃興師與戰西江二國爭彊未知存亡
子胥知時變為詐兵為兩翼夜火相應旬踐大恐振旅
服降進兵圍越會稽填山子胥微策可謂神守戰數年

勾踐行成子胥爭諫以是不容宰嚭許之引兵而還夫
差聽嚭不殺仇人興師十萬與不敵同聖人譏之是以
春秋不差其文故傳曰子胥賢者尚有就李之恥此之
謂也哀哉夫差不信伍子胥而任太宰嚭乃此禍晉之
驪姬亡周之褒姒盡妖妍於圖畫極凶悖於人理傾城
傾國思昭示於後王麗質冶容宜求監於前史古人云
苦藥利病苦一作忠吉利行伏念居安思危日謹一日易
曰知進而不知退知存而不知亡知得而不知喪又曰

進退存亡不失其正者唯聖人乎由此而言進有退之
義存有亡之幾得有喪之理愛之如父母仰之如日月
敬之如神明畏之如雷霆此其可以卜祚遐長而禍亂
不作也

越絕書卷九

欽定四庫全書

越絕書卷十

漢 袁康 撰

外傳記吳王占夢

昔者吳王夫差之時其民殷衆禾稼登熟兵革堅利其
民習於鬪戰闔廬闔剏子胥之教行有日發有時道於
姑胥之門晝卧姑胥之臺覺寤而起其心惆悵如有所
悔即召太宰而占之曰向者晝卧夢入章明之宮入門

見兩鑊炊而不蒸見兩黑犬嗥以壯嗥以南見兩鑊倚
吾宮堂見流水湯湯越吾宮牆見前園橫索生樹桐見
後房鍛者扶挾鼓小震子為寡人精占之吉則言吉凶
則言凶無諛寡人之心所從太宰嚭對曰善哉大王興
師伐齊夫章明者伐齊克天下顯明也見兩鑊炊而不
蒸者大王聖氣有餘也見兩黑犬嗥以壯嗥以南四夷
已服朝諸侯也兩鑊倚吾宮堂夾田夫也見流水湯湯
越吾宮牆獻物已至則有餘也見前園橫索生樹桐樂

府吹巧也見後房鍛者扶挾鼓小震者宮女鼓樂也吳王大悅而賜太宰嚭雜繒四十疋王心不已召王孫駱而告之對曰臣智淺能薄無方術之事不能占大王夢臣知有東掖門亭長越公弟子公孫聖為人幼而好學長而慧遊博聞彊識通於方來之事可占大王所夢臣請召之吳王曰諾王孫駱移記曰今日壬午左校司馬王孫駱受教告東掖門亭長公孫聖吳王晝卧覺寤而心中惆悵也如有悔記到車馳詣姑胥之臺聖得記發

而讀之伏地而泣有頃不起其妻大君從旁接而起之
曰何若子性之大也希見人主卒得急記流涕不止公
孫聖仰天歎曰嗚呼悲哉此固非子胥所能知也今日
壬午時加南方命屬蒼天不可逃亡伏地而泣者不能
自惜但吳王諫心而言師道不明正言直諫身死無功
大君曰汝彊食自愛慎勿相忘伏地而書既成篇即與
妻把臂而訣涕泣如雨上車不顧遂至姑胥之臺謁見
吳王吳王勞曰越弟子公孫聖也寡人畫卧姑胥之臺

夢入章明之宮入門見兩鑊炊而不蒸見兩黑犬嗥以
壯嗥以南見兩鐸倚吾宮堂見流水湯湯越吾宮牆見
前園橫索生樹桐見後房鍛者扶扶鼓小震子為寡人
精占之吉則言吉凶則言凶無諛寡人心所從公孫聖
伏地有頃而起仰天歎曰悲哉夫好船者溺好騎者墮
君子各以所好為禍諛謾申者師道不明正言切諫身
死無功伏地而泣者非自惜因悲大王夫章者戰不勝
走偉偉明者去昭昭就冥冥見兩鑊炊而不蒸者王且

不得火食見兩黑犬嘴以壯嘴以南者大王身死魂魄
惑也見兩鐸倚吾宮堂者越人入吳邦伐宗廟掘社稷
也見流水湯湯越吾宮牆者大王宮堂虛也前園橫索
生樹桐者桐不為器用但為俑當與人俱葬後房鍛者
鼓小震者大息也王母自行使臣下可矣太宰嚭王孫
駱惶怖解冠幘肉袒而謝吳王忿聖言不祥乃使其身
自受其殃王乃使力士石番以鐵杖擊聖中斷之為兩
頭聖仰天歎曰蒼天知冤乎直言正諫身死無功令吾

家無葬我提我山中後世為聲響吳王使人提於秦餘
杭之山虎狼食其肉野火燒其骨東風至飛揚汝灰汝
更能為聲哉太宰嚭前載拜曰逆言以滅讒諛以亡因
酌行觴時可以行矣吳王曰諾王孫駘為左校司馬太
宰嚭為右校司馬王從騎三千旌旗羽蓋自處中軍伐
齊大蒐師兵三月不去過伐晉晉知其兵革之罷倦糧
食盡索與師擊之大敗吳師涉江流血浮尸者不可勝
數吳王不忍率其餘兵相將至秦餘杭之山饑餓足行

乏糧視瞻不明據地飲水持籠稻而餐之顧謂左右曰此何名羣臣對曰是籠稻也吳王曰悲哉此公孫聖所言王且不得火食太宰嚭曰秦餘杭山西坂間燕可以休息大王亟食而去尚有十數里耳吳王曰吾嘗戮公孫聖於斯山子試為寡人前呼之即尚在耶當有聲響太宰嚭即上山三呼聖三應吳王大怖足行屬腐面如死灰色曰公孫聖令寡人得邦誠世世相事言未畢越王追至兵三圍吳大夫種處中范蠡數吳王曰王有過

者五寧知之乎殺忠臣伍子胥公孫聖胥為人先知忠
信中斷之入江聖正言直諫身死無功此非大過者二
乎夫齊無罪空復伐之使鬼神不血食社稷廢蕪父子
離散兄弟異居此非大過者三乎夫越王勾踐雖東僻
亦得繫於天皇之位無罪而王恒使其芻蕘秩馬比於
奴虜此非大過者四乎太宰嚭讒諛佞諂斷絕王世聽
而用之此非大過者五乎吳王曰今日聞命矣越王撫
步光之劍杖屈盧之弓瞋目謂范蠡曰子何不早圖之

乎范蠡曰臣不敢殺主臣存主若亡今日遂敬天報微
功越王謂吳王曰世無千歲之人死一耳范蠡左手持
鼓右手操枹而鼓之曰上天蒼蒼若存若亡何須軍士
斷子之頸挫子之骸不亦繆乎吳王曰聞命矣以三寸
之帛冥吾兩目使死者有知吾慚見伍子胥公孫聖以
為無知吾恥生越王則解綬以冥其目遂伏劍而死越
王殺太宰嚭戮其妻子以其不忠信斷絕吳之世

越絕書卷十

欽定四庫全書

越絕書卷十一

漢 袁康 撰

外傳記寶劍

昔者越王勾踐有寶劍五聞於天下客有能相劍者名
薛燭王召而問之曰吾有寶劍五請以示之薛燭對曰
愚理不足以言大王請不得已乃召掌者王使取橐
薛燭對曰橐非寶劍也夫寶劍五色並見莫能相勝

豪曾已擅名矣非寶劍也王曰取巨闕薛燭曰非寶劍也寶劍者金錫和銅而不離今巨闕已離矣非寶劍也王曰然巨闕初成之時吾坐於露壇之上宮人有四駕白鹿而過者車奔鹿驚吾引劍而指之四駕上飛揚不知其絕也穿銅釜絕鐵鑑胥中決如粢米故曰巨闕王取純鈎薛燭聞之忽如敗有頃懼如悟下階而深惟簡衣而坐望之手振拂揚其華粹如芙蓉始出觀其鋸爛如列星之行觀其光渾渾如水之溢於塘觀其斷巖巖

如瑣石觀其才煥煥如冰釋此所謂純鈎耶王曰是也
客有直之者有市之鄉二駿馬千匹千戶之都二可乎
薛燭對曰不可當造此劍之時赤董之山破而出錫若
耶之溪涸而出銅雨師掃灑雷公擊橐蛟龍捧鑪天帝
裝炭太一下觀天精下之歐冶乃因天之精神悉其伎
巧造為大刑三小刑二一曰湛盧二曰純鈎三曰勝邪
四曰魚腸五曰巨闕吳王闔盧之時得其勝邪魚腸湛
盧闔盧無道子女死殺生以送之湛盧之劍去之如水

行秦過楚楚王卧而寤得吳王湛盧之劍將首魁漂而存焉秦王聞而求不得興師擊楚曰與我湛盧之劍還師去汝楚王不與時闔廬又以魚腸之劍刺吳王僚使披腸夷之甲三事闔廬使專諸為秦炙魚者引劍而刺之遂弑王僚此其小試於敵邦未見其大用於天下也今赤董之山已合若耶溪深而不測羣神不下歐冶子即死雖復傾城量金珠玉竭河猶不能得此一物有市之鄉二駿馬千匹千戶之都二何足言哉楚王名風胡

子而問之曰寡人聞吳有干將越有歐冶子此二子甲
世而生天下未嘗有精誠上通天下為烈士寡人顧齊
邦之重寶皆以奉子因吳王請此二人作鐵劍可乎風
胡子曰善於是乃令風胡子之吳見歐冶子干將使人
作鐵劍歐冶子干將鑿茨山淺其溪取鐵英作為鐵劍
三枚一曰龍淵二曰泰阿三曰工布一作市畢成風胡子
奏之楚王楚王見此三劍之精神大悅風胡子問之曰
此三劍何物所象其名為何風胡子對曰一曰龍淵二

曰泰阿三曰工布楚王曰何為龍淵泰阿工布風胡子
對曰欲知龍淵觀其狀如登高山臨深淵欲知泰阿觀
其鉢巍巍翼翼如流水之波欲知工布鉢從丈起至脊
而止如珠不可袵丈若流水不絕晉鄭王聞而求之不
得興師圍楚之城三年不解倉穀粟索庫無兵革左右
羣臣賢士莫能禁止於是楚王聞之引泰阿之劍登城
而麾之三軍破敗士卒迷惑流血千里猛獸歐瞻江水
折揚晉鄭之頭畢白楚王於是大悅曰此劍威耶寡人

力耶風胡子對曰劍之威也因大王之神楚王曰夫劍
鐵耳固能有精神若此乎風胡子對曰時各有使然軒
轅神農赫胥之時以石為兵斷樹木為宮室死而龍藏
夫神聖主使然至黃帝之時以玉為兵以伐樹木為宮
室鑿地夫玉亦神物也又遇聖主使然死而龍藏禹穴
之時以銅為兵以鑿伊闕通龍門決江導河東注於東
海天下通平治為宮室豈非聖主之力哉當此之時作
鐵兵威服三軍天下聞之莫敢不服此亦鐵兵之神大

王有聖德楚王曰寡人聞命矣

越絕書卷十一

欽定四庫全書

越絕書卷十二

漢 袁康 撰

內經九術

昔者越王勾踐問大夫種曰吾欲伐吳奈何能有功乎
大夫種對曰伐吳有九術王曰何謂九術對曰一曰尊
天地事鬼神二曰重財幣一作帛以遺其君三曰貴糴粟
橐以空其邦四曰遺之好美以為勞其志五曰遺之巧

丘使起宮室高臺盡其財疲其力六曰遺其諛臣使之易伐七曰彊其諫臣使之自殺八曰邦家富而備器九曰堅厲甲兵以承其弊故曰九者勿患戒口勿傳以取天下不難況於吳乎越王曰善於是作為策楯嬰以白璧鏤以黃金類龍蛇而行者乃使大夫種獻之於吳曰東海役臣孤句踐使者臣種敢修下吏問於左右賴有天下之力竊為小殿有餘財載拜獻之大王吳王大悅申胥諫曰不可王勿受昔桀起靈門紂起鹿臺陰陽不

和五穀不時天與之災邦家空虛遂以之亡大王受之
是後必有災吳王不聽遂受之而起姑胥臺三年聚財
五年乃成高見二百里行路之人道死尸哭越乃飾美
女西施鄭旦使大夫種獻之於吳王曰昔者越王句踐
竊有天之遺西施鄭旦越邦洿下貧窮不敢當使下臣
種載拜獻之大王吳王大悅申胥諫曰不可王勿受臣
聞五色令人目不明五音令人耳不聰桀易湯而滅紂
易周文而亡大王受之後必有殃胥聞越王句踐晝書

不倦晦誦竟旦聚死臣數萬是人不死必得其願胥聞
越王勾踐服誠行仁聽諫進賢士是人不死必得其名
胥聞越王勾踐冬披毛裘夏披絲絰是人不死必為利
害胥聞賢士邦之寶也美女邦之咎也夏亡於妹喜殷
亡於妲己周亡於褒姒吳王不聽遂受其女以申胥為
不忠而殺之越乃興師伐吳大敗之於秦餘杭山滅吳
禽夫差而戮太宰嚭與其妻子

外傳記軍氣

夫聖人行兵上與天合德下與地合明中與人合心義
合乃動見可乃取小人則不然以彊厭弱取利於危不
知逆順快心於非故聖人獨知氣變之情以明勝負之
道凡氣有五色青黃赤白色因有五變人氣變軍上
有氣五色相連與天相抵此天應不可攻攻之無後其
氣盛者攻之不勝軍上有赤色氣者徑抵天軍有應於
天攻者其誅乃身軍上有青氣盛明從闕其本廣末銳
而來者此逆兵氣也為未可攻衰去乃可攻青氣在上

其謀未定青氣在右將弱兵多青氣在後將勇毅少先
大後小青氣在左將少卒多兵少軍罷青氣在前將暴
其軍必來赤氣在軍上將謀未定其氣本廣未銳而來
者為逆兵氣衰去乃可攻赤氣在右將軍勇而兵少卒
彊必以殺降赤氣在後將弱卒彊敵少攻之殺將其軍可
降赤氣在右將勇敢多兵卒彊赤氣在前將勇兵少毅
多卒少謀不來黃氣在軍上將謀未定其本廣未銳而
來者為逆兵氣衰去乃可攻黃氣在右將智而明兵多

卒彊穀足而不可降黃氣在後將智而勇卒彊兵少穀
少黃氣在左將弱卒少兵少穀亡攻之必傷黃氣在前
將勇智卒多彊穀足而有多為一作馬不可攻也白氣在

軍上將賢智而明卒威勇而彊其氣本廣末銳而來者
為逆兵氣衰去乃可攻白氣在右將勇而兵彊兵多穀
亡白氣在後將仁而明卒少兵多穀少軍傷白氣在左
將勇而彊卒多穀少可降白氣在前將弱卒亡穀少攻
之可降黑氣在軍上將謀未定其氣本廣末銳而來者

為逆兵去乃可攻黑氣在右將弱卒少兵亡穀盡軍傷
可不攻自降黑氣在後將勇卒彊兵少穀亡攻之殺將
軍亡黑氣在左將智而勇卒少兵少攻之殺將其軍自
降黑氣在前將智而明卒少穀盡可不攻自降故明將
知氣變之形氣在軍上其謀未定其在右而低者欲為
右伏兵之謀其氣在前而低者欲為前伏陣也其氣在
後而低者欲為走兵陣也其氣陽者欲為去兵其氣在
左而低者欲為左陣其氣間其軍欲有入邑右子胥相

氣取敵大數其法如是軍無氣算於廟堂以知彊弱一
五九西向吉東向敗亡無東二六十南向吉壯向敗亡
無壯三七十一東向吉西向敗亡無西四八十二壯向
吉南向敗亡無南北其用兵日月數吉凶所避也舉兵
無擊太歲上物卯也始出各利以其四時制日是之謂
也

韓故治今京兆郡角亢也

鄭故治角亢也

燕故治今上漁陽右北平遼東莫郡尾箕也

越故治今大越山陰南斗也

吳故治西江都牛湏女也

齊故治臨菑今濟北平原北海郡菑川遼東城陽虛危
也

衛故治濮陽今廣陽韓郡營室璧也

魯故治太山東溫周固水今魏東奎婁也

梁故治今濟陰山陽濟北東郡畢也

晉故治今代郡常山中山河間廣平郡皆也

秦故治雍今內史也巴郡漢中隴西定襄太原安邑東井也

韓故治雒今河南郡柳七星張也

楚故治郢今南郡南陽汝南淮陽六安九江廬江豫章長沙翼軫也

趙故治邯鄲今遼東隴西北地上郡鴈門北郡清河參也

越絕書卷十二

欽定四庫全書

越絕書卷十三

漢 袁康 撰

外傳枕中

昔者越王勾踐問范子曰古之賢主聖王之治何左何右何去何取范子對曰臣聞聖主之治左道右術去末取實越王曰何謂道何謂術何謂末何謂實范子對曰道者天地先生不知老曲成萬物不名巧故謂之道道

生氣氣生陰陰生陽陽生天地天地立然後有寒暑燥濕日月星辰四時而萬物備術者天意也盛夏之時萬物遂長聖人緣天心助天喜樂萬物之長故舜彈五絃之琴歌南風之詩而天下治言其樂與天下同也當是之時頌聲作所謂末者名也故名過實則百姓不附親賢士不為用而外缺諸侯聖主不為也所謂實者穀缺也得人心任賢士也凡此四者邦之實也越王曰寡人躬行節儉下士求賢不使名過實此寡人所能行也多

貯穀富百姓此乃天時水旱寧在一人耶何以備之范
子曰百里之神千里之君湯執其中和舉伊尹收天下
雄雋之士練卒兵率諸侯兵伐桀為天下除殘去賊萬
民皆歌而歸之是所謂執其中和者越王曰善哉中和
所致也寡人雖不及賢主聖王欲執其中和而行之今
諸侯之地或多或少彊弱不相當兵革暴起何以應之
范子曰知保人之身者可以王天下不知保人之身失
天下者也越王曰何謂保人之身范子曰天生萬物而

教之而生人得穀即不死穀能生人能殺人故謂人身
越王曰善哉今寡人欲保穀為之奈何范子曰欲保必
親於野覩諸所多少為備越王曰所少可得為因其貴
賤亦有應乎范子曰夫八穀貴賤之法必察天之三表
即決矣越王曰請問三表范子曰水之勢勝金陰氣蓄
積大盛水據金而死故金中有水如此者歲大敗八穀
皆貴金之勢勝木陽氣蓄積大盛金據木而死故木中
有火如此者歲大美八穀皆賤金木水火更相勝此天

之三表者也不可不察能知三表可為邦寶不知三表
之君千里之神萬里之君故天下之君發號施令必順
於四時四時不正則陰陽不調寒暑失常如此則歲惡
五穀不登聖主施令必審於四時此至禁也越王曰此
寡人所能行也願欲知圖穀上下貴賤欲與他貨之內
以自實為之奈何范子曰夫八穀之賤也如宿穀之登
其明也諦審察陰陽消息觀市之反覆雌雄之相逐天
道乃畢越王問范子曰何執而昌何行而亡范子曰執

其中則昌行奢侈則亡越王曰寡人欲聞其說范子曰臣聞古之賢主聖君執中和不原其終始即位安而萬物定矣不執其中和不原其終始即尊位傾萬物散文武之業桀紂之跡可知矣古者天子及至諸侯自滅至亡漸漬乎滋味之費沒溺於聲色之類牽擎於珍怪貴重之器故其邦空虛困其士民以為須臾之樂百姓皆有悲心瓦解而倍畔者桀紂是也身死邦亡為天下笑此謂行奢侈而亡也湯有七十里地務執三表可謂邦

寶不知三表身死棄道越王問范子曰春肅夏寒秋榮
冬泄人治使然乎將道也范子曰天道三千五百歲一
治一亂終而復始如環之無端此天之常道也四時易
次寒暑失常治民然也故天生萬物之時聖人命之曰
春春不生遂者故天不重為春春者夏之父也故春生
之夏長之秋成而殺之冬受而藏之春肅而不生者王
德不完也夏寒而不長者臣下不奉主命也秋順而復
榮者百官刑不斷也冬溫而泄者發府庫賞無功也此

所謂四時者邦之禁也越王曰寒暑不時治在於人可知也願聞歲之美惡穀之貴賤何以紀之范子曰夫陰陽錯繆即為惡歲人生失治即為亂世夫一亂一治天道自然八穀亦一賤一貴極而復反言亂三千歲必有聖王也八穀貴賤更相勝故死凌生者逆大貴生凌死者順大賤越王曰善越王問於范子曰寡人聞人失其魂魄者死得其魂魄者生物皆有之將人也范子曰人有之萬物亦然天地之間人最為貴物之生穀為貴以

生人與魂魄無異可得豫知也越王曰其善惡可得聞乎范子曰欲知八穀之貴賤上下衰極必察其魂魄視其動靜觀其所舍萬不失一問曰何謂魂魄對曰魂者橐也魄者生氣之源也故神生者出入無門上下無根見所而功自存故名之曰神神主生氣之精魂主死氣之舍也魄者主賤魂者主貴故當安靜而不動魂者方盛夏而行故萬物得以自昌神者主氣之精主貴而雲行故方盛夏之時不行則神氣槁而不成物矣故死凌

生者歲大敗生凌死者歲大美故觀其魂魄即知歲之善惡矣越王問於范子曰寡人聞陰陽之治不同力而功成不同氣而物生可得而知乎願聞其說范子曰臣聞陰陽氣不同處萬物生焉冬三月之時草木既死萬物各異藏故陽氣避之下藏伏壯於內使陰陽得成功於外夏三月盛暑之時萬物遂長陰氣避之下藏伏壯於內然而萬物親而信之是所謂也陽者主生萬物方夏三月之時大熱不至則萬物不能成陰氣主殺方冬

三月之時地不內藏則根荄不成即春無生故一時失
度即四序為不行越王曰善寡人已聞陰陽之事穀之
貴賤可得而知乎范子曰陽者主貴陰者主賤故當寒
而不寒者穀為之暴貴當溫而不溫者穀為之暴賤譬
猶形影聲響相聞豈得不復哉故曰秋冬貴陽氣施於
陰陽極而復貴春夏賤陰氣施於陽陽極而不復越王
曰善哉以丹書帛置之枕中以為國寶越五日困於吳
請於范子曰寡人守國無術負於萬物幾亡邦危社稷

為旁邦所議無定足而立欲捐軀出死以報吳仇為之奈何范子曰臣聞聖主為不可為之行不惡人之謗已為足舉之德不德人之稱已舜循之歷山而天下從風使舜釋其所循而求天下之利則恐不全其身昔者神農之治天下務利之而已矣不望其報不貪天下之財而天下共富之所以其智能自貴於人而天下共尊之故曰富貴者天下所置不可奪也今王利地貪財接兵血刃僵屍流血欲以顯於世不亦謬乎越王曰上不逮

於神農下不及於堯舜今子以至聖之道以說寡人誠
非吾所及也且吾聞之也父辱則子死君辱則臣死今
寡人親已辱於吳矣欲行一切之變以復吳仇願子更
為寡人圖之范子曰君辱則死固其義也立死下士人
而求成邦者上聖之計也且夫廣天下尊萬乘之主使
百姓安其居樂其業者唯兵兵之要在於人人之要在
於穀故民衆則主安穀多則兵彊王而備此二者然後
可以圖之也越王曰吾欲富邦彊兵地狹民少奈何為

之范子曰夫陽動於上以成天文陰動於下以成地理審察開置之要可以為富凡欲先知天門開及地戶閉其術天高五寸減天寸六分以成地謹司八穀初見出於天者是謂天門開地戶閉陽氣不得下入地戶故氣轉動而上下陰陽俱絕八穀不成大貴必應其歲而起此天變見符也謹司八穀初見入於地者是謂地戶閉陰陽俱會八穀大成其歲大賤來年大饑此地變見端也謹司八穀初見半於人者糴平熟無災害故天倡而

見符地應而見端聖人上知天下知地中知人此之謂
天平地平以此為天圖越王既已勝吳三日反邦未至
息自雄問大夫種曰夫聖人之術何以加于此乎大夫
種曰不然王得范子之所言故天地之符應邦以藏聖
人之心矣然而范子豫見之策未肯為王言者也越王
慄然而恐面有憂色請於范子稱曰寡人用夫子之計
幸得勝吳盡夫子之力也寡人聞夫子明於陰陽進退
豫知未形推往引前後知千歲可得聞乎寡人虛心垂

意聽于下風范子曰夫陰陽進退前後幽冥未見未形此特殺生之柄而王制于四海此邦之重寶也王而母泄此事臣請為王言之越王曰夫子幸教寡人願與之自藏至死不敢忘范子曰陰陽進退者固天道自然不足怪也夫陰入淺者即歲善陽入深者則歲惡幽幽冥冥豫知未形故聖人見物不疑是謂知時固聖人所不傳也夫堯舜禹湯皆有豫見之勞雖有凶年而民不窮越王曰善以丹書帛置之枕中以為邦寶范子已告越

王立志入海此謂天地之圖也

越絕書卷十三

欽定四庫全書

越絕書卷十四

漢 袁康 撰

外傳春申君

昔者楚考烈王相春申君吏李園園女弟女環謂園曰
我聞王老無嗣可見我於春申君我欲假於春申君我
得見於春申君徑得見於王矣園曰春申君貴人也千
里之佐吾何託敢言女環曰即不見我汝求謁於春申

君才人告遠道客請歸待之彼必問汝汝家何等遠道客者因對曰園有女弟魯相聞之使使者來求之園才人使告園者彼必有問汝女弟何能對曰能鼓音讀書通一經故彼必見我園曰諾明日辭春申君才人有遠道客請歸待之春申君果問汝家何等遠道客對曰園有女弟魯相聞之使使求之春申君曰何能對曰能鼓音讀書通一經春申君曰可得見乎明日使待於離亭園曰諾既歸告女環曰吾辭於春申君許我明日夕待於

離亭女環曰園宜先供待之春申君到園馳人呼女環
到黃昏女環至大縱酒女環鼓琴曲未終春申君大悅
留宿明日女環謂春申君曰妾聞王老無嗣屬邦於君
君外淫不顧政事使王聞之君上負於王使妾兄下負
於夫人為之奈何無泄此口君召而戒之春申君以告
官屬莫有聞淫女也皆曰諾與女環通未終月女環謂
春申君曰妾聞王老無嗣今懷君子一月矣可見妾於
王幸產子男君即王公也而何為佐乎君戒念之五日

而道之邦中有好女中相可屬嗣者烈王曰諾即召之烈王悅取之十月產子男十年烈王死幽王嗣立女環使園相春申君相之三年然後告園以吳封春申君使備東邊園曰諾即封春申君於吳幽王後懷王使張儀詐殺之懷王子頃襄王秦始皇帝使王翦滅之

德序外傳記

昔者越王勾踐困於會稽歎曰我其不伯乎欲殺妻子角戰以死蠡對曰殆哉王失計也愛其所惡且吳王賢

不離不肖不去若卑辭以地讓之天若棄彼彼必許句
踐曉焉曰豈然哉遂聽能以勝越王句踐即得平吳春
祭三江秋祭五湖因以其時為之立祠垂之來世傳之
萬載鄰邦樂德以來取足范蠡內視若盲反聽若聾度
天闕涉天機後袵天人前帶神光當是時言之者闢其
去甚微甚密王已失之矣然終難復見得於是度兵徐
州致貢周室元王以之中興號為州伯以為專句踐之
功非王室之力是時越行伯道沛歸於宋浮陵以付楚

臨期開陽復之於魯中邦侵伐因斯哀止以其誠行於內威發於外越專其功效曰越絕是也故傳曰桓公迫於外子能以覺悟句踐報於會稽能因以伯克舜雖聖不能任狼致治管仲能知人桓公能任賢蠡善慮患句踐能行焉臣主若斯其不伯得乎易曰君臣同心其利斷金此之謂也

吳越之事煩而文不喻聖人畧焉賢者垂意深省厥辭觀斯智愚夫差狂惑賊殺子胥句踐至賢種曷為誅范

蠡恐懼逃于五湖蓋有說乎夫吳知子胥賢猶昏然誅之傳曰人之將死惡聞酒肉之味邦之將亡惡聞忠臣之氣身死不為醫邦亡不為謀還自遺災蓋木土水火不同氣居此之謂也

種立休功其後厥過自伐勾踐知其仁也不知其信見種為吳通越稱君子不危窮不滅服以忠告勾踐非之見乎顏色范蠡因心知意策問其事卜省其辭吉耶凶耶兆言其災夫子見利與害去于五湖蓋謂知其道貴

微而賤獲易曰知幾其神乎道以不害為左傳曰知始無終厥道必窮此之謂也

子胥賜劍將自殺歎曰嗟乎衆曲矯直一人固不能獨立吾挾弓矢以逸鄭楚之間自以為可復吾見凌之仇乃先王之功想得報焉自致於此吾先得榮後僇者非智哀也先遇明後遭險君之易移也已矣生不遇時復何言哉此吾命也亡將安之莫如早死從吾先王于地下蓋吾之志也吳王將殺子胥使馮同徵之胥見馮同

知為吳王來也洩言曰王不親輔弼之臣而親衆豕之
言是吾命短也高置吾頭必見越人入吳也我王親為
禽哉捐我深江則亦已矣胥死之後吳王聞以為妖言
甚咎子胥王使人捐於大江口勇士執之乃有遺響發
憤馳騰氣若奔馬威凌萬物歸神大海彷彿之間音兆
常在后世稱述蓋子胥水僊也

子胥挾弓去楚唯夫子獨知其道事關世關有退至今
實之實秘文之事深述厥兆徵為其戒齊人歸女其後

亦重各受一篇文辭不既經傳外章輔發其類故聖人見微知著覩始知終由此觀之夫子不王可知也恭承嘉惠述暢往事夫子作經攬史記憤懣不泄兼道事後覽承傳說厥意以為周道不敝春秋不作蓋夫子作春秋記元於魯大義立微言屬五經六藝為之檢式垂意於越以觀枉直陳其本末抽其統紀章決句斷各有終始吳越之際夫差弊矣是之謂也故觀乎太伯能知聖賢之分觀乎荆平能知信勇之變觀乎吳越能知陰謀

之慮觀乎計倪能知陰陽消息之度觀乎請糴能知
人之使敵邦寶不肖觀乎九術能知取人之真轉禍之
福觀乎兵法能知却敵之路觀乎陳恒能知古今相取
之術觀乎德敘能知忠直所死狂情通拙經百八章上
下相明齊桓興盛執操以同管仲達于霸紀范蠡審乎
吉凶終始夫差不能闢邦之治療乎馮同宰嚭能知諂
臣之所移哀彼離德信不用內痛子胥忠諫邪君反受
其咎夫差誅子胥自此始亡之謂也

越絕書卷十四

欽定四庫全書

越絕書卷十五

漢 袁康 撰

敘外傳記

維先古九頭之世蒙水之際興敗有數承三繼五故曰
衆者傳目多者信德自此之時天下大服三皇以後以
一治人至於三王爭心生兵革越作肉刑五胥因悉挾
方氣歷天漢孔子感精知後有彊秦喪其世而漢興也

賜權齊晉越入吳孔子推類知後有蘇秦也權衡相動
衡五相發道獲麟周盡證也故作春秋以繼周也此時
天地永清日月一明弟子欣然相與太平孔子懷聖承
弊無尺土所有一民所子睹麟垂涕傷民不得其所非
聖人孰能痛世若此萬代不滅無能復述故聖人沒而
微言絕賜見春秋改文尚質譏二名興素王亦發憤記
吳越章句其篇以喻後賢賜之說也魯安吳吳敗晉彊
越霸世春秋二百餘年垂象後王賜傳吳越關指於秦

聖人發一隅辯士宣其辭聖文絕於彼辯士絕於此故題其文謂之越絕問曰越絕始於太伯終於陳恒何論語曰雖小道必有可觀者焉乃太伯審於始知去上賢太伯特不恨讓之至也始於太伯仁賢明大吳也仁能生勇故次以荆平也勇士胥忠正信智以明也智能生詐故次以吳人也善其務救蔡勇其伐荆其范蠡行為持危救傾也莫如循道順天富邦安民故次計倪富邦安民故於自守易以取故次請糴也一其愚故乖其政

也

問曰請粟者求其福祿必可獲故次以九術順天心終和親即知其情策於廊廟以知彊弱時至伐必可克故次兵法兵凶器也動作不當天與其殃知此上事乃可用兵易之卜將春秋無將子謀父臣殺主天地所不容載惡之甚深故終於陳恒也易之下將春秋無將今荆平何善乎君無道臣仇主以次太伯何曰非善荆平也乃勇士胥也臣不討賊子不復仇非臣子也故賢其寃

於無道之楚困不死也善其以匹夫得一邦之衆並義復仇傾諸侯也非義不為非義不死也

問曰子胥妻楚王母無罪而死於吳其行如是何義乎曰孔子固貶之矣賢其復仇惡其妻楚王母也然春秋之義量功掩過也賢之親親也子胥與吳何親乎曰子胥以困于闔廬闔廬勇之甚將為復仇名譽甚著詩云投我以桃報之以李夫差下愚不移終不可奈何言不用策不從昭然知吳將亡也受闔廬厚恩不忍去而自

存欲著其諫之功也故先吳敗而殺也死人且不負而
况面在乎昔者管仲生伯業興子胥死伯名成周公責
一槩不求備於一人及外篇各有差敘師不說

問曰子胥未賢耳賢者所過化子胥賜劍欲無死得乎
盲者不可示以文繡聾者不可語以調聲瞽瞍不移商
均不化湯鑿夏臺文王拘於殷時人謂舜不孝堯不慈
聖人不悅下愚而况乎子胥當困於楚劓於吳信不去
耳何捐之有孔子貶之奈何其報楚也稱子胥妻楚王

母及乎夷狄貶之言吳人也問曰句踐何德也曰伯德
賢君也傳曰危人自安君子弗為奪人自與伯夷不多
行偽以勝滅人以伯其賢奈何曰是固伯道也祺道厭
駁一善一惡當時無天子彊者為右使句踐無權滅邦
久矣子胥信而得衆道范蠡善偽以勝當明王天下太
平諸侯和親四夷樂德欵塞貢珍屈膝請臣子胥何由
乃困於楚范蠡不久乃為狂者勾踐何當屬莖養馬遭
逢變亂權以自存不亦賢乎行伯非賢晉文之能因時

順宜隨而可之故空社易為福危民易為德是之謂也
問曰子胥范蠡何人也子胥勇而智正而信范蠡智而
明皆賢人問曰子胥死范蠡去二人行違皆稱賢何論
語曰陳力就列不能者止事君以道言耳范蠡單身人
越主於伯有所不合故去也問曰不合何不死曰去止
事君之義也義無死胥死者受恩深也今蠡猶重也不
明甚矣問曰受恩死死之善也臣事君猶妻事夫何以
去論語曰三日不朝孔子行行者去也傳曰孔子去魯

燔俎無肉曾子去妻糲蒸不熟微子去比干死孔子并稱仁行雖有異其義同死與生敗與成其同奈何論語曰有殺身以成仁子胥重其信范蠡責其義信從中出義從外出微子去者痛殷道也比干死者忠於紂也算子亡者正其紀也皆忠信之至相為表裏耳問曰二子孰愈乎曰以為同耳然子胥無為能自免於無道之楚不亡舊功滅身為主合即能以霸不合可去則去可死則死范蠡遭世不明被髮佯狂無正不行無主不止色

斯而舉不害於道億則屢中貨財殖聚作詐成伯不合乃去三遷避位名聞海內去越入齊老身西陶仲子由楚傷中而死二子行有始終子胥可謂兼人乎問曰子胥伐楚宮射其子不殺何也弗及耳楚世子奔逃雲夢之山子胥兵笞平王之墓昭王遣大夫申包胥入秦請救于斧漁子進諫子胥子胥適會秦救至因引兵還越見其榮於無道之楚興兵伐吳子胥以不得已迎之就李問曰笞墓何名乎子之復仇臣之討賊至誠感天矯

枉過直乳狗哺虎不計禍福大道不誅誅首惡子胥笞墓不究也

維子胥之述吳越也因事類以曉後世著善為誠識惡為誠句踐以來至乎更始之元五百餘年吳越相攻復見於今百歲一賢猶為此肩記陳厥說略其有人以去為姓得衣乃成厥名有米覆之以庾禹來東征死葬其疆不直自斥託類自明寫精露愚略以事類俟告後人文屬辭定自于邦賢邦賢以口為姓承之以天楚相屈

原與之同名明於古今德配顏淵時莫能與伏竄自容
年加申酉懷道而終友臣不施猶夫子得麟覽觀厥意
嗟歎其文於乎哀哉溫故知新述暢子胥以喻來今經
世歷覽論者不得莫能達焉猶春秋銳精堯舜垂意周
文配之天地著於五經齊德日月此智陰陽詩之伐柯
以己喻人後生可畏蓋不在年以口為姓萬事道也承
之以天德高明也屈原同名意相應也百歲一賢賢復
生也明於古今知識宏也德比顏淵不可量也時莫能

用籥口鍵精深自誠也猶子得麟丘道窮也姓有去不能容也得衣乃成賢人衣之能章也名有米八政寶也覆以庚兵絕之也於乎哀哉莫肯與也屈原隔界放於南楚自沈湘水蠡所有也



越絕書卷十五